

- गृहमंत्री अमित शाह कह्यो—बदलता बगत मांय पुलिस रा काम करण रा तौर—तरीका अर रूप मांय बदलाव ज़रूरी।
- केन्द्रीय मंत्री जयंत चौधरी कह्यो—केन्द्र सरकार मोटी तादाद मांय कौशल महोत्सव राखेला।
- प्रदेश रा कई शहरां मांय हवा री गुणवत्ता बिगड़ी—भिवाड़ी रो एक्यूआई 300 ने पार कीनो।
- टोंक ज़िला रा समरावता मांय उपचुणाव रे दिन व्हया वाकया री जांच संभागीय आयुक्त ऊं करायी जावेला।

000

गृहमंत्री अमित शाह कह्यो है के बदलता बगत मांय पुलिस रा काम करण रा तौर—तरीका अर रूप मांय बदलाव ज़रूरी व्हे ग्यो है। वे आज गुजरात रा गांधी नगर मांय 50वां अखिल भारतीय पुलिस विज्ञान सम्मेलन रा उद्घाटन ज़ब्सा मांय बोल रह्या हा। शाह कह्यो के लारला दस साल मांय देश झगड़ा वाढ़ा हलकां मांय हिंसा मांय कमी लावण री खास उपलब्धि हासिल कीनी है। गृहमंत्री कह्यो के देश मांय लारला पचास साल मांय खास बदलाव व्हया है। वे कह्यो के जम्मू—कश्मीर, पूर्वांतर अर नक्सलियां रा असर वाढ़ां हलकां समेत उग्रवाद रा असर वाढ़ां हलकां मांय हिंसा मांय 70 फीसदी कमी आयी है। अखिल भारतीय पुलिस विज्ञान सम्मेलन पुलिस अनुसंधान अर विकास ब्यूरो—बीपीआरडी अर राष्ट्रीय रक्षा शक्ति विश्वविद्यालय कानों ऊं मिल र करायो जा रह्यो है।

000

केन्द्रीय कौशल विकास अर उद्यमिता मंत्री जयंत चौधरी कह्यो है के वां रा मंत्रालय री ओर ऊं मोटा पैमाना माथे कौशल महोत्सव राख्या जावेला। वे आज भरतपुर मांय राख्यी ज्या कौशल महोत्सव मांय बोल रह्या हा। वे कह्यो के केन्द्र सरकार बेरोजगार नौजवानां ने मुफ़्त सिखावण दे र वां ने नौकरी—धंधा रा मौका मुहैया करा रही है।

-----

कौशल विकास अर उद्यमिता मंत्रालय री ओर ऊं आज भरतपुर मांय राख्यी ज्या कौशल महोत्सव मांय 50 ऊं बत्ती कंपनियां करीब अढाई हज़ार नौजवानां ने नौकरी रा प्रस्ताव दीना। कार्यक्रम मांय मंत्री जयंत चौधरी नौजवानां ने नियुक्ति पत्र सूच्या। ई मौके कौशल नियोजन अर उद्यमिता राज्य मंत्री के.के. बिश्नोई, विश्वकर्मा कौशल बोर्ड रा अध्यक्ष गोपाल सुथार अर भरतपुर रा विधायक डॉक्टर सुभाष गर्ग ई मौजूद रह्या।

000

कृषि अर किसान कल्याण मंत्री शिवराज सिंह चौहान कह्यो है के सरकार देश मांय जैविक खेती ने बधावो देवण बाबत् सग़ा ज़रूरी जतन कर रही है। वे आज नई दिल्ली मांय वैश्विक मृदा सम्मेलन 2024 मांय वर्चुअल तरीका ऊं बोल रह्या हा। कृषि मंत्री कह्यो के मिटटी रो स्वास्थ्य अब दुनियाभर मांय चिंता रो मुददो बण ग्यो है। चौहान कह्यो के खेती लायक करीब 30 फीसदी मिट्टी खराब व्हे ग्यी है अर रासायनिक खाद ने बत्ती तादाद मांय काम लेवण ऊं मिट्टी ने घणो नुकसान व्हे रह्यो है। चौहान भणाई—लिखाई, प्रोत्साहन अर नुवी तकनीक रे मार्फत किसानां ने मजबूत बणावण बाबत् कह्यो।

000

जल शक्ति मंत्रालय आज विश्व शौचालय दिवस रे मौके हमारा शौचालयः हमारा सम्मान नाम रो तीन सप्ताह रो अभियान सरू कीनो। ई अभियान रो मकसद साफ—सफाई रा बुनियादी ढांचा मांय सुधार, व्यवहार मांय बदलाव ने बधावो देवण अर देश भर मांय शौचालयां री कार्यक्षमता अर रख—रखाव ने बधा र सामुदायिक गौरव ने मजबूत करणो है। अभियान रे दौरान होड़ां राख्यी जावेला अर जनता ने सोशल मीडिया प्लेटफॉर्म रे मार्फत सफाई री सफलता री कहानियां बतावण सारू बधावो दियो जावेला। ओ अभियान आवता महीना री 10 तारीख ने मानवाधिकार दिवस रे मौके पूरो व्हेला।

000

पैली वाळी प्रधानमंत्री इंदिरा गांधी री जयंती रे मौके आज प्रदेशभर मांय न्यारा—न्यारा कार्यक्रमां रे जरिये वां ने याद करी ज्यी। जैसलमेर अर बाड़मेर मांय जिला कांग्रेस कमेटी री ओर ऊं राख्यी ज्यी श्रद्धांजलि सभा मांय पार्टी रा ओहदादार, जनता रा नुमाइन्दा अर कार्यकर्ता सिरकत कीनी। सवाईमाधोपुर अर भीलवाड़ा मांय कांग्रेस रा दफ्तर मांय पुष्पांजलि कार्यक्रम राख्यी ज्यो। पाली मांय राख्यी ज्यी गोष्ठी मांय इन्दिरा गांधी री जिन्दगी अर काम रा बारा मांय चर्चा करी ज्यी।

000

प्रदेश मांय पारो उत्तरण सागे हवा री गुणवत्ता माथे घणो असर व्हे रह्यो है। लारला दो—तीन दिन मांय कई ठौड़ां हवा री गुणवत्ता खराब ऊं घणी खराब रेंज मांय मापी ज्यी। देश मांय न्यारी—न्यारी ठौड़ां लारला 24 घंटा मांय हवा री गुणवत्ता रा हालात रा बारा मांय केंद्रीय प्रदूषण नियंत्रण मंडल कानी ऊं आज जारी करी ज्यी रपट रे मुजब प्रदेश मांय ई कई ठौड़ां हवा री गुणवत्ता खराब मिली। दिल्ली कने भिवाड़ी मांय एयर क्वालिटी इंडेक्स—एक्यूआई 300 ने पार कर ग्यो। ई सागे ई, बारां, भरतपुर, धौलपुर, झुञ्जुनू, करौली अर सीकर मांय ई घणो प्रदूषण मिल्यो है। राजधानी जयपुर मांय ई न्यारी—न्यारी ठौड़ां हवा री गुणवत्ता घणी खराब रही। शहर मांय न्यारी—न्यारी ठौड़ां एक्यूआई 200 ऊं ऊंचो मापी ज्यो। बीकानेर मांय ई हवा री गुणवत्ता माथे असर पड़्यो है। झुञ्जुनू मांय एयर क्वालिटी इंडेक्स 228 दर्ज करी ज्यो। घणा प्रदूषण रे कारण बुजुर्गा अर अस्थमा रा मरीजां ने सांस लेवण मांय परेशानी रो सामो करणो पड़् रह्यो है। जिला कलेक्टर रामावतार मीणा स्वास्थ्य विभाग रा अहलकारां ने सांस लेवण मांय तकलीफ रा मरीजां सारू अस्पतालां मांय खास प्रबंध करण रा हुकम दीना है। जिला प्रशासन जनता ने घर ऊं बाहर जाती बगत मास्क काम लेवण री राय दीनी है।

000

प्रदेश मांय सुबह—शाम हल्की ठण्ड महसूस व्हेवण लागी है। अधिकतम तापमान मांय गिरावट व्ही है, पण हाल ई दिन मांय सर्दी रो असर ज्यादा महसूस नी व्हे रह्यो है। बीती रात घणखार ठौड़ां तापमान 15 डिग्री सेल्सियस या इण ऊं कम दर्ज करी ज्यो। मौसम केन्द्र जयपुर ऊं मिली जाणकारी रे मुजब आज ई सीकर जिला रो फतेहपुर प्रदेश मांय सब ऊं सीझी ठौड़ रह्यो। मौसम केन्द्र जयपुर रा निदेशक राधेश्याम शर्मा बतायो के फिलहाल पारा मांय और गिरावट रा आसार नी है।

000

देवली—उनियारा विधानसभा हलका रा समरावता गांव मांय विधानसभा उपचुनाव सारू वोट पड़बा रे दिन 13 नवम्बर रा वाकया पाछे गांव रा नुमाइन्दा रो एक दल आज जयपुर मांय मंत्रियां रा समूह सागे बातचीत कीनी। ई समूह मांय मंत्री किरोड़ी लाल मीणा, राज्य मंत्री कन्हैया लाल चौधरी अर जवाहर सिंह बेढ़म भेड़ा हा।

बातचीत पाढे खबरनवीसां सागे बातचीत करता थकां मंत्री किरोड़ी लाल मीणा आरोप माण्ड्यो के राज्य री लारली सरकार जल्दबाजी मांय केर्ए ज़िला अर तहसीलां बणायी, ज्यां कारण ऐडा हालात बण्या। वे बतायो के समरावता समेत पांच पंचायतां रा 28 गांवां ने देवली उपखंड ऊं उनियारा उपखंड मांय शामिल करण परा एक राय बण म्ही है। वे कह्यो के ई मामला री जांच सीमित समय मांय संभागीय आयुक्त ऊं करावण समेत केर्ए फैसला करी ज्या। मीणा कह्यो के गांव मांय ई कारण व्ह्या नुकसाण री भरपायी करी जावेला अर पुलिस कानी ऊं पकड़ी ज्या निर्दोष लोगां ने छोड़्या जावेला।

---

मंत्रियां सागे बातचीत करण वाळा प्रतिनिधिमंडल रा सदस्य संतोष जताता थकां कह्यो के वां री मांगां मान लीरीजी है।

000

जालौर रा किसान जवाई बांध ऊं जवाई नदी मांय पाणी छोड़बा री मांग करता थकां आज ज़िला कलेक्टर रा दफ्तर सामी प्रदर्शन कीनो। ज़िला प्रशासन हालात माथे निजर राख रह्यो है।

000

स्कूल शिक्षा अर भाषा विभाग रा शासन सचिव कृष्ण कुणाल पीएमश्री स्कूलां मांय न्यारी—न्यारी गतिविधियां सारु असरदार कार्य योजना बणावण रा हुकम दीना है। वे पीएमश्री स्कूलां री समीक्षा बैठक मांय बोल रह्या हा। कृष्ण कुणाल 26 नवम्बर ने संविधान दिवस रे मौके पीएमश्री स्कूलां मांय खास कार्यक्रम राखण बाबत् ई कह्यो।

000

भरतपुर मांय काल संभाग स्तर री अमृता हाट सरु करी जावेला। महिला अधिकारिता विभाग रा उपनिदेशक राजेश कुमार बतायो के 26 नवम्बर तांई लगायी जावण वाळी अमृता हाट मांय महिला स्वयं सहायता समूहां कानी ऊं बणायी ज्या सामान रो दरसाव अर बिकी करी जावेला। अमृता हाट मांय राज्य रा सगळा ज़िलां रा महिला स्वयं सहायता समूहां री ओर ऊं स्टॉल लगायी जावेला।

000

प्रधानमंत्री नरेन्द्र मोदी 24 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 116वीं कड़ी व्हेला। आप ई ई महीना री 22 तारीख तांई मुफ्त नम्बर 1 8 0 0 – 1 1 – 7 8 0 0 डायल कर र सुझाव दे सको हो। ई रे अलावा 1922 नम्बर माथे मिस्ड कॉल दे र एस एस रे जरिये मिल्या लिंक ऊं ई सुझाव दिया जा सके है। ई सागे ई नरेन्द्र मोदी एप या माई जीओवी ओपन फोरम रे जरिये ई ऑनलाइन तरीका ऊं सुझाव दिया जा सके है।

000